

narias en calquera momento da súa execución se o cumprimento da sanción se revela prexudicial na evolución educativa do menor.

2. As medidas anteriores non se poderán adoptar sen autorización do xuíz de menores cando este interviñese na súa imposición por vía de recurso.

Artigo 83. *Extinción automática de sancións.*

1. Cando un menor ingrese novamente nun centro para a execución doutra medida, extinguiranse automaticamente a sanción ou sancións que fosen impostas nun ingreso anterior e que quedasen incumpridas total ou parcialmente.

2. En caso de traslado de centro, o menor continuará o cumprimento das sancións impostas no centro anterior, sen prexuízo do disposto no anterior artigo.

Artigo 84. *Prescrición de faltas e sancións.*

1. As faltas disciplinarias moi graves prescriben ao ano; as graves, aos seis meses, e as leves, aos dous meses, contados desde a data da comisión da infracción.

2. A prescrición das faltas interrómpese a partir do momento en que, con coñecemento do menor, se inicia o procedemento disciplinario, volvéndose iniciar o cómputo da prescrición desde que se paralice o procedemento durante un mes por causa non imputable ao presunto infractor.

3. As sancións impostas por faltas moi graves, graves e leves prescriben, respectivamente, nos mesmos prazos sinalados no número 1. O prazo de prescrición empeza a contar desde o día seguinte a aquel en que adquira firmeza o acordo sancionador ou desde que se levante o aprazamento da execución ou a suspensión da efectividade, ou desde que se interrompa o cumprimento da sanción se este xa comezou.

Artigo 85. *Incentivos.*

Os actos do menor que poñan de manifesto boa conduta, espírito de traballo e sentido da responsabilidade no comportamento persoal e colectivo, así como a participación positiva nas actividades derivadas do proxecto educativo, poderán ser incentivados pola entidade pública con calquera recompensa que non resulte incompatible coa lei e cos preceptos deste regulamento.

Disposición adicional única. *Actuacións policiais de vixilancia, custodia e traslado.*

1. As actuacións policiais de vixilancia, custodia e traslado de menores previstas neste regulamento serán realizadas polos corpos de policía autonómica ou, se é o caso, polas unidades adscritas do Corpo Nacional de Policía, nos seus ámbitos territoriais de actuación, de conformidade co disposto no artigo 45 da Lei orgánica 5/2000, do 12 de xaneiro.

En caso de ausencia ou insuficiencia das anteriores, ou cando sexan varias as comunidades autónomas afectadas, serán realizadas polas forzas e corpos de seguridade do Estado.

2. Para os efectos do disposto no número anterior, o director do centro solicitará a intervención ao órgano competente da comunidade autónoma ou, se é o caso, ao delegado ou ao subdelegado do Goberno, con suficiente antelación para permitir a súa planificación.

En situacións de urxencia, cando non sexa posible actuar conforme o previsto no parágrafo anterior, o director do centro poderá solicitar directamente a intervención das forzas e corpos de seguridade competentes, dando conta diso inmediatamente ás autoridades antes mencionadas, con expresión das causas da urxencia.

MINISTERIO DE EDUCACIÓN E CIENCIA

15616 *REAL DECRETO 1830/2004, do 27 de agosto, polo que se establece un novo prazo para a entrada en vigor de determinados artigos do Real decreto 285/2004, do 20 de febreiro, polo que se regulan as condicións de homologación e validación de títulos e estudos estranxeiros de educación superior.* («BOE» 210, do 31-8-2004.)

Polo Real decreto 285/2004, do 20 de febreiro, ditouse unha nova regulación das condicións de homologación e validación de títulos e estudos estranxeiros de educación superior, en exercicio da competencia atribuída ao Goberno polo artigo 36 da Lei orgánica 6/2001, do 21 de decembro, de universidades.

Este real decreto, publicado no «Boletín Oficial del Estado» do 4 de marzo de 2004, debe entrar en vigor aos seis meses desa publicación. Non obstante, diversas circunstancias aconsellan adiar a entrada en vigor de dous aspectos recollidos na dita norma: o novo procedemento de homologación a graos académicos e o sistema de comités técnicos, como órganos informantes en substitución do Consello de Coordinación Universitaria.

En canto ao procedemento de homologación a graos académicos dos establecidos no artigo 37 da Lei orgánica 6/2001, do 21 de decembro, de universidades, a conveniencia do seu adiamento vén determinada polo feito de que aínda non se desenvolveu este artigo mediante os oportunos reais decretos que regulen a estrutura das ensinanzas universitarias e os estudos universitarios de grao e posgrao. Non parece adecuado pór en funcionamento os mecanismos conducentes á homologación de grao con carácter xeral sen que previamente se definise e estruturase convenientemente esta figura coa dimensión que lle outorga a Lei orgánica 6/2001, do 21 de decembro, que introduce un concepto substancialmente distinto do que ata hoxe lle veu sendo asociado.

Polo que se refire aos comités técnicos, púxose de manifesto a imposibilidade de instaurar, con garantías de eficacia, o sistema previsto nos artigos 10 e 11 do Real decreto 285/2004, do 20 de febreiro, para a data sinalada para a súa entrada en vigor, pola existencia de importantes dificultades materiais para regular o seu funcionamento, delimitar o seu número, establecer o seu procedemento de actuación, constituílos e transferir as necesarias dotacións orzadas, entre outros problemas. Esas dificultades, insalvables no período que queda ata a entrada en vigor do real decreto, darían lugar a un resultado contrario aos obxectivos de axilidade, simplificación e celeridade pretendidos pola norma.

Este real decreto foi sometido a informe do Consello de Coordinación Universitaria.

Na súa virtude, por proposta da ministra de Educación e Ciencia, coa aprobación previa do ministro de Administracións Públicas, de acordo co Consello de Estado e logo de deliberación do Consello de Ministros na súa reunión do día 27 de agosto de 2004:

Artigo único. Adiamento do réxime de homologación a graos académicos e do funcionamento dos comités técnicos establecidos polo Real decreto 285/2004, do 20 de febreiro.

Establécese un novo prazo de seis meses, contados a partir da entrada en vigor deste real decreto, para a aplicación dos artigos do Real decreto 285/2004, do 20 de febreiro, polo que se regulan as condicións de homologación e validación de títulos e estudos estranxeiros de educación superior, que se citan a continuación:

a) Os artigos 1.b) 3.b), 18, 19, 20 e 21, relativos á homologación de títulos estranxeiros de educación superior a graos académicos universitarios españois.

b) Os artigos 10, 11, 12 e 13.b), e a disposición adicional terceira, referidos aos comités técnicos.

Durante o prazo sinalado, as competencias atribuídas a estes comités técnicos, e todas as mencións efectuadas a estes no texto do Real decreto 285/2004, do 20 de febreiro, entenderanse referidas ao órgano competente do Consello de Coordinación Universitaria, que seguirá exercendo a función de emisión de informes, que o artigo 9 do Real decreto 86/1987, do 16 de xaneiro, atribuíra ao Consello de Universidades.

Disposición derradeira primeira. Título competencial.

Este real decreto dítase ao abeiro do disposto no artigo 149.1.30.^a da Constitución española e de acordo co establecido no artigo 36.2.b) da Lei orgánica 6/2001, do 21 de decembro, de universidades.

Disposición derradeira segunda.[002]Desenvolvemento normativo.

Correspóndelle ao ministro de Educación e Ciencia a competencia para desenvolver o establecido neste real decreto.

1. Disposición derradeira terceira.[002]Entrada en vigor.

2. Este real decreto entrará en vigor o día seguinte ao da súa publicación no «Boletín Oficial del Estado».

1. Dado en Palma de Mallorca o 30 de agosto de 2004.

JUAN CARLOS R.

A ministra de Educación e Ciencia
María Jesús San Segundo Gómez de Cadiñanos

MINISTERIO DE AGRICULTURA, PESCA E ALIMENTACIÓN

15618 REAL DECRETO 1833/2004, do 27 de agosto, polo que se fixan os requisitos para a obtención do título de capitán de pesca e as atribucións que este confire. («BOE» 210, do 31-8-2004.)

A Lei 3/2001, do 26 de marzo, de pesca marítima do Estado, establece no seu artigo 42 que o Goberno, por proposta do ministro de Agricultura, Pesca e Alimentación, regulará as titulacións dos profesionais do sector no marco do sistema educativo xeral, establecendo os requisitos e coñecemento de idoneidade e as atribucións profesionais correspondentes a cada título, sen prexuízo das competencias do Ministerio de Fomento.

O Real decreto 930/1998, do 14 de maio, sobre condicións xerais de idoneidade e titulación de determinadas profesións da mariña mercante e do sector pesqueiro, establece na súa disposición derogatoria única a derogación do Decreto 2596/1974, do 9 de agosto, sobre titulacións profesionais da mariña mercante e de pesca, excepto no relativo ao capitán de pesca, é dicir, as atribucións e condicións para obter esta titulación.[

Os aspirantes ao título de capitán de pesca, de acordo co establecido no Decreto 2596/1974, do 9 de agosto, debían encontrarse en posesión do extinto título de patrón de pesca de altura, razón pola cal se fai necesaria unha actualización das condicións de obtención da titulación de capitán de pesca para adecualas á normativa vixente.

Na elaboración deste real decreto foron consultadas as comunidades autónomas e o sector pesqueiro afectado.

Na súa virtude, por proposta da ministra de Agricultura, Pesca e Alimentación, de acordo co Consello de Estado e logo de deliberación do Consello de Ministros na súa reunión do día 27 de agosto de 2004,

D I S P O Ñ O :

Artigo 1. *Condicións do título de capitán de pesca.*

As condicións para a obtención do título de capitán de pesca en buques pesqueiros son as seguintes:

a) Estar en posesión do título de patrón de altura para buques de pesca, regulado no artigo 3.1.2.º do Real decreto 930/1998, do 14 de maio, sobre condicións xerais de idoneidade e titulación de determinadas profesións da mariña mercante e do sector pesqueiro, ou do título de patrón de pesca de altura cuxas atribucións, segundo o disposto no punto 1 da disposición adicional segunda do citado real decreto, están reguladas no Decreto 2596/1974, do 9 de agosto, sobre titulacións profesionais da mariña mercante e de pesca.

b) Ter cumprido 600 días de embarco con posterioridade á data de obtención do título de patrón de altura ou patrón de pesca de altura, a bordo de buques de pesca nacionais ou a bordo de buques de pesca pertencentes a sociedades mixtas, participadas por capital español e constituídas segundo os criterios establecidos no artigo 8 do Regulamento (CE) n.º 2792/1999 do Consello, do 17 de decembro de 1999, polo que se definen as modalidades e condicións das intervencións con finalidade estrutural no sector da pesca.

c) Ter aprobado o exame correspondente.

Artigo 2. *Atribucións.*

As atribucións que confire o título de capitán de pesca nos buques pesqueiros para a súa obtención son as seguintes:

a) Mando de buques de pesca dedicados a calquera clase de pesca, sen limitación de tonelaxe nin distancia da costa.

b) Enrolarse como primeiro oficial de ponte, en buques pesqueiros dedicados a calquera clase de pesca.

Disposición derogatoria única. *Derrogación normativa.*

Quedan derogados os artigos 1, número 2, no relativo ao capitán de pesca, e o artigo 3, número 1, do Decreto 2596/1974, do 9 de agosto, sobre titulacións profesionais da mariña mercante e de pesca, e cantas disposicións de igual ou inferior rango se opoñan ao establecido neste real decreto.

Disposición derradeira primeira. *Título competencial.*

Este real decreto dítase ao amparo do establecido no artigo 149.1.19.^a da Constitución, que lle atribúe ao Estado a competencia exclusiva en materia de bases de ordenación do sector pesqueiro.

Disposición derradeira segunda. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Palma de Mallorca o 27 de agosto de 2004.

JUAN CARLOS R.

A ministra de Agricultura, Pesca
e Alimentación,
ELENA ESPINOSA MANGANA